

■ COLUMNA

Pandemia, Barbarademia ed outras demias

GISULA TSCHARNER*

Oz en damaun hai jau vesì – cun ir a pe ils 200 meters da la pendiculara a la staziun da Razén – blier rument sper il trottuar e perfin sin il prà dasperas: Tut be mascras duvradas e tschuffas. I pareva sco in'invasiun, prest sco la massa da stumbels da cigarettas a l'ur dals perruns en las staziuns da viafier pli grondas. Quai è, pari, ina nova «demia», perquai che questa mascrademia vegn ad esser in problem en l'entir mund, betg mo a Razén, almain dapertut en il mund, nua che la glieud ha la pussaivladad da cumprar mascras, da cumprar mascras en reserva (= ina dumonda da la bainstanza, sa chapescha). Ina ulteriura pandemia?

Segir! Il pled è oriundamain grec. «Pan» signifitga «tut, dapertut, universal». La segunda part dal pled, «demia» vegn da «demos»: Manegia è l'entira vischnanca, l'entir chantun, l'entir stadi, tut il pievel. En consequenza datti er la mascrademia. Ubain ina temademia, quai è la tema da vegnir malsau, e quella è derasada prest dapli ch'il virus sez. Ella sa er mazzar, ma pli plaun, ed il murir social na vegn betg publicitg en cifras, stedia-



main – cler, quai fiss demia penibel.

A partir da quest'emna ha er cumenzà la naldemia, e sco preparativa a quella er la glischademia, quellas illuminaziuns sur las stradas localas, tut il sbrinzlim electric en ierts e vi da chasas che enervescha ils passants. Quels emblidan lura garantidamain la pensivladad quieta, la quala vegn vendida cun premura durant las quatter emnas avant Nadal. E quai prest dapertut, en l'entir mund. Betg mo en regiuns cristifidaivlas – l'economia ha annectà e derasà il messadi da la glisch gia daditg, e quai en dimensiuns mundialas: Pia in'ulteriura pandemia, e cun ella cooperescha er la regaldemia.

La regal(pan)demia è in malsogna fitg derasada, stuschond tanta glieud en in squitsch social da regalar, cumprar, ed en conse-

quenza savens en debits u miseria. Però nus ans essan uschè ditg disads vidlonder che questa pandemia da mintg'onn d'advent è integrada gia detg bain en noss mintgadi.

Ma ussa vegn anc il «clu», ina varianta da pandemia zunt positiva, la Barbarademia! Oz è ils 4 da december, il firà da la Sontga Barbara: Quella vala sco patruna da tut ils lavurers ed inschigners da tunnels, perquai ch'ella senza è vegnida mazzada pervi da sia conversiun al cristianissem. Ella haja la forza da pertgirar dad accidents en tunnels, dini e craini.

Anc blier pli vegl è la savida da la vita nova che sa preschenta en il «romin da Barbara»: rumpa in romin da tschareschas u dad outra pumera ed al metta en ina vasa cun aua, en stiva chauda! Enturn Nadal circa vegn il romin a flurir! Quai è vairamain l'entschatta da l'onn da natura, ed en consequenza er da l'onn ecclesiastic. He, va ordadora, prenda intgins romins en Tia chasa e dà a la speranza la schanza da flurir! Pertgirainsa ensemen la Barbarademia!

***Gisula Tschärner è spirituala libra en pensiun, stat a Veulden. Ella viva er lavura cun las plantas selvadias en ed enturn la vischnanca.**